

IL PREMI

AL ATLETE AUSTRALIAN IL XX^M PREMI GAMAJUN

Pistorius, il coraç de disabilitât

La storie e je chê di Oscar Pistorius, 24 agns, amputât bilaterâl, ma campion paralimpic tal 2004 sui 200 metris e tal 2008 sui 100, 200 e 400 metris. A lui, il Laboratori internazionâl de comunicazion, che di passe vincj agns si davuelç a Glemone, i à assegnât il XX Gamajun Internazionâl Award-Premio Bruno De Marchi. Un premi par Pistorius, pal so impegn, pe fuarte determinazion che lu à judât a frontâ grandis sfidis, stant i siei problemis fisics, propit te citadine dulà che e je insedade la facultât di Siencis motoris de Universitât regionâl e dulà che la amministrazion locâl e je daûr a puartâ indenant il proget Citât dal sport.

Ce impuortance aial par lui il premi Gamajun?

Al è un grant onôr, no ai mai cjapât un premi come chest. Come duçj i sportîfs, o soi usât a cjapâ premis e ricognossiments su la piste. O ai let il materiâl sul Laboratori e o riten une vore interessant il nivel inteletuâl proponût ai tancj students che a vegnin di ogni ban-

de dal mont a Glemone. Cuant che o lavi a scuele, o jeri un bon student ma no un grant studiôs, tal sens che no frecuentavi masse par vie dai alenaments, ma ançe parcè che o studiavi dome ce che mi plaseve.

Lis sôs disabilitâts trop lu àno condizionât te ativitât sportive?

Mi àn judât, tal sens che mi àn dât une vore di determinazion e di snait e che mi àn formât come persone. Clâr che no mi àn judât tal sens fisic, ma o crôt che cressint mi vedin judât a diventâ une persone determinade e convinte, con obietîfs di puartâ indenant.

Se nol fos stât disabil, pensial che si sarès interessât istès di sport?

La mè famee e je simpri stade ative tal mont dal sport. Gno nono al jere pugil, gno fradi, che al à doi agns plui di me, si dediche al sport, mê sùr invezit il sport lu à in asse: e je la piore fûr di trop. Duncje, no sai se o sarès diventât un professionist de atletiche, ma o pensi che mi sarès interessât e che o varès praticât. La disabilitât mi à dât un

stimul in plui. I miei gjentôrs, cuant che o vevi di fâ des robis, mi disevin simpri: "Prove ancjemò, no sta preocupâti".

Si sintival tant diviers devant di chei altris?


Forsit, tal in prin, cuant che di frut o lavi a scuele, mi sintivi diferent, ma tal zîr di pôc timp mi soi rindût cont che chei altris mi viodevin come che mi viodevi jo. Alore, viodint che jo no i davi pês, ançe chei altris no àn fat plui câs.

Come che lôr si metevin lis scarpis a buinore, jo mi metevi lis protesîs.

Pensial che intune societât dulà che no si fâs pesâ lis diferencis, la vite e sedi plui facil pes personis disabilis?

In chescj ultims 15 agns di ativitât agonistiche, o ai viodût che il numar des personis restadis amputadis par colpe di malatiis, diabete e incidents e ançe lis vitimis de vue-

re a son cressudis sedi tai Stâts Unîts che tal Ream Unît, e chest al à zovât par che l'argoment nol sedi plui tabù. Des voltis, mi capite di finî i alenaments e di lâ tal bar a bevi alc cui bregonuts curts, e duncje cu lis protesîs in mostre. Cuant che o viôt gjentôrs che ai lôr fîs ur fasin moto di zirâsi di chê altre bande, mi svicini e o dîs: "Mandî, o soi Oscar e chestis a son lis mès protesîs, parcè che cuant che o jeri



Pistorius a Glemone

Il Laboratori internazionâl de comunicazion

Al nas a Rome, vie pal 1963, inte suaze dai cors estîfs di talian pai students forescj de Universitât catolice dal Cûr di Jesù di Milan. Il Friûl al è stât sielzût come lûc di pueste par inviâ relaçions fra Europe occidentâl e orientâl. Prin di rivâ a Glemone dal 1989, il Lab al à vût acêt a Triest, a Cividât e a Tumieç. Di vincj agns, il Lab al organize il Premi Gamajun Internazionâl Award, che cumò al è intitulât a Bruno De Marchi, professôr de Bocconi di Milan e fondadôr dal Lab.

students dal Lab di Glemone?

O ai volût fevelâ, cun "humour", de disabilitât. Dispès, la int e pense che i atletis a sedin diviers di chei altris, ma in realtât no 'nd è diferencis.

No mi plasin i discors preparâts, chê e je robe par oratôrs, mi plâs sintî lis personis a fevelâ in maniere libare.

PIERO CARGNELUTTI

piçul no mangjavi la verdure". In cheste maniere, la volte dopo che mi viodin, par lôr al è plui facil capi la mè situazion.

Ce messaç aial volût puartâur ai